

興國州志卷之

人物志

興國人物自晉以上不可考今自晉以下其事迹之嫩有見諸正史及前朝紀載者列為名賢其服官中外著有政聲者列為宦績次則文學武功忠義孝友以及為善于鄉義行可風者各以類登載至耆壽之民隱逸之士亦附于篇末焉  
名賢

晉

孟嘉字萬年江夏鄆人吳司空宗曾孫也陶潛孟府君傳云曾祖

興國州志 卷二十 名賢

一

空祖父揖元康中為廬陵太守宗葬武昌陽新縣子孫家焉遂為縣人也君少失父奉母二弟居娶大司馬長沙桓公第十女

人閨孝友 嘉少知名太尉庾亮領江州辟廬陵從事轉勸學從

事褚裒時為豫章太守正旦朝亮裒有器識亮大會州府人士

嘉坐次甚遠裒問亮聞江州有孟嘉其人何在亮曰在坐卿但

自覓裒歷觀指嘉謂亮曰此君小異將無是乎亮欣然而笑喜

裒得嘉奇嘉為裒所得乃益器焉陶傳云舉秀才又為安西將

軍 後為征西桓溫參軍溫甚重之陶傳云奉使京師除尚書

疾不任拜起詔使人扶入 嘉好酣飲愈多不亂溫問嘉酒有

何好而卿嗜之嘉曰公未得酒中趣耳又問聽妓絲不如竹竹

不如肉何也嘉答曰漸近自然一坐咨嗟轉從事中郎遷長史年五十三卒於家

見晉書列傳

孟陋字少孤嘉弟少而貞立清操絕倫喪母毀瘠殆于滅性不飲酒食肉十有餘年親族謂之曰少孤誰無父母誰有父母若毀性無嗣更爲不孝也陋感此言然後從吉簡文帝輔政命爲參軍稱疾不起桓溫躬往造焉或謂孟陋學爲儒宗宜引在府溫歎曰會稽王尙不能屈非敢擬議也陋博學長於三禮注論語行于世卒以壽終

見晉書隱逸傳

祀鄉賢祠

五代

興國州志

卷二十 名賢

二

吳舉字太冲李煜時以明經爲彭澤主簿宋太祖遣曹彬征江南前鋒兵破池陽遣使招降郡縣至彭澤其令欲降舉責以大義遂殺使者彬部下執之舉曰吾世食祿李氏國亡而死職也彬義而釋之當是時嘗仕煜者皆隨煜至京師得復補吏舉獨棄去不顧至太宗太平興國二年詔求李氏故吏所在敦遣舉始至京師以爲鄆州平陰主簿卒官零陵令舉學春秋通三傳臨大節知所守歐陽修銘其墓

宋史吳中復傳作仲舉爲池陽令歐陽公吳君墓碣銘作舉爲彭澤

主簿彼此互異按歐公與中復同時墓碣所載較宋史爲詳今從之祀鄉賢祠

宋

吳中復字仲庶舉次子進士及第知峨眉縣邊夷民事淫祠悉禁之居官廉代還不載一物通判潭州御史中丞孫抃薦爲監察御史初不相識也或問之抃曰昔人恥爲呈身御史今豈有識面臺官耶遷殿中侍御史劾宰相梁適適罷中復亦通判虔州未至復還臺彈宰相劉沆沆罷改右司諫同知諫院遷御史知雜事

此下舊志及省志俱有風節峻厲仁宗以飛白書鐵御史三字賜之之語

累進龍圖閣直學士

知江甯府郵兵苦巡轄官苛刻繫而鞭之獄具法不至死中復

以便宜戮首惡流其餘入奏爲令歷成德軍成都府永興軍河北行青苗法使者至將先下口縣中復檄之曰斂散自有期今

興國州志

卷二十 名賢

三

先事擾之何也拒不聽且以報安撫司韓琦方疏諫青苗錄其語以上關內大旱民多流亡中復請加賑卹執政惡之遣使往視謂爲不實削一階提舉玉隆觀起知荆南坐過用公使酒免

卒中復樂易簡約好周人之急士大夫稱之

見宋史列傳

祀鄉賢祠

吳擇仁字智夫以父任

父名審禮

爲雍邱主簿元祐中嘗詣朝堂白事

宰相范純仁異之曰簿領中乃有是人耶建中靖國初畿內飢多盜以擇仁知大鹿縣始至令賊曹曰民窮而盜非天性也我以靜鎮之若亡命椎埋故犯一切誅之毋得貸羣盜相戒不入境中貴人譚積奴犯法按致于理積恚造譖徽宗召戶部郎中

宋喬年往鞫喬年伉吏也疾驅至慮囚擿隱剔決帑庾出入不能得毫毛罪歸傳舍擇仁上謁喬年迎笑曰所以來爲察君罪顧乃得一竒士吾今薦君矣居數日召詣闕時方有事青唐擢熙河路轉運判官卽以直祕閣爲副使從招討使王厚領兵深入克蘭廓城柵十三加直龍圖進集賢殿修撰爲京畿都轉運使鄭州城惡受命更築之或讒于帝帝遣人取塊城上緘以來令衛卒三投之堅緻如鐵讒不能售遂拜戶部侍郎兼知開封府府吏有竇鑑者以捕盜寵官諸司使服金帶狃舊態來前擇仁叱而械諸獄賣珠人居民貨久不返事急匿宦官楊戩第擇

興國州志

卷二十名賢

四

仁跡取之竄於遠戩中以事出爲顯謨閣直學士知熙州徙永興軍後起知青州未拜卒見宋史列傳□祀鄉賢祠

吳立禮中復子治平二年進士歷官御史有父風烈祀鄉賢按宋史吳中復傳

附從孫擇仁未載立禮其事蹟無可考惟岳珂愧鄉錄載元祐未議南北郊有立禮與呂大防蘇軾范祖禹等主合祭一事

盛子充崇寧進士親喪廬墓鄉里稱其孝臧書甚富家有萬卷閣

與王黼同舍黼旣相一無所求仕止朝奉郎見明一統志祀鄉賢祠

王質字景文其先鄆州人後徙興國博通經史善屬文遊太學與九江王阮齊名阮每云聽景文論古如讀酈道元水經名川支川貫穿周匝無有間斷咳唾皆成珠璣著論五十篇言歷代君

臣治亂謂之樸論中紹興三十年進士第用大臣言召試館職不就明年金主完顏亮南侵御史中丞汪澈宣諭荆襄又明年樞密使張浚都督江淮皆辟爲屬入爲太學正時孝宗屢易相國論未定質乃上疏論戰守和事天子心知質忠而忌者共讒質年少好異論遂罷去會虞允文宣撫川陝辟質偕行一日令草檄契丹文援毫立就辭氣激壯允文起執其手曰景文天才也入爲勅令所刪定官遷樞密院編修官允文當國孝宗命擬進諫官允文以質鯁亮不回且文學推重於時可右正言時中貴人用事多畏憚質陰沮之出通判荆南府改吉州皆不行奉

興國州志

卷二十名賢

五

祠山居絕意祿仕淳熙十五年卒

見宋史列傳

祀鄉賢祠

吳必大字伯豐以父彥夔蔭爲饒州司戶遷吉水縣丞屬臺諫指朱子爲僞學遂棄官歸早事張栻呂祖謙晚事朱子其造詣亞於黃榦李燔與陳淳相伯仲朱子答林德久書云有江西吳必大者相從累年明敏過人從事州縣隨事有以及人而自守勁正不爲時勢所屈甚不易得其卒也朱子答劉季章書云伯豐講論剖析貫通非諸人所及心固期以遠到不謂乃止於此今承來諭又得其守之堅此尤不易吾道不幸遽失此人

見元趙復朱門

弟子五十所著有師誨集祀鄉賢祠

明

孔克仁由行省都事進郎中嘗偕宋濂侍太祖太祖數與論天下形勢及前代興亡事陳友諒既滅太祖志圖中原謂克仁曰元運既隳豪傑互爭其釁可乘吾欲督兩淮江南諸郡之民及時耕種加以訓練兵農兼之進取退守仍於兩淮間餽運可通之處儲糧以俟兵食既足中原可圖卿以爲何如克仁對曰積糧訓兵觀釁待時此長策也及徐達等下淮東西又謂克仁曰壬辰之亂生民塗炭中原諸將孛羅擁兵犯闕亂倫干紀行已夷滅擴廓挾太子以稱戈急私讐無敵愾之志思齊輩碌碌竊據

興國州志

卷二十名賢

六

一方民受其害士誠外假元名反覆兩端明玉珍父子據蜀僭號喜於自用而無遠謀觀其所爲皆不能有成予揆天時審人事有可定之機今師西出襄樊東踰淮泗首尾相應擊之必勝大事可成天下不難定既定之後生息猶難方勞思慮耳克仁侍帷幄最久故獲聞太祖謀畧居多洪武二年四月命克仁等授諸子經功臣子弟亦令入學已出知江州入爲參議坐事死

見明史列傳○按明史謂爲句容人舊志謂爲陽新里人吳國倫興國孔氏譜序謂克仁父文學教授興國路以中原烽燧起不能復東遂家焉又云克仁歷官浙東按察使卒於官其弟克寬疏以其柩歸葬興國詔許之又孔氏譜云克仁子

希彰後占籍陽新里故舊志稱爲州人也

成務字惟幾樂平里人洪武二十九年舉人授廣元教諭適御史按部率諸生郊迎已望見遽麾諸生返御史至問諸生何在對曰大人行李甚盛恐士子見之壞心術已麾之去矣御史奇之薦擢行人使暹羅改御史歷四川河南陝西順天諸處振揚風紀永樂間設貴州省上見務英偉曰黑御史可任按察使務至威不可犯庭無留政人以鐵面稱後卒於官詔賜祭貴州廟祀之歷仕二十五載未嘗攜家見楚紀祀鄉賢祠

劉諒字守貞宣化坊人景泰間以國子生授直隸鹽城知縣竈戶非重犯不服有司勾攝諒至別竈戶之籍名於官者餘悉編氓

興國州志

卷二十名賢

七

法乃得行慨科目乏人延禮碩彥訓誨諸生暇則出郊勸農親授芸刈之法值蝗禱於城隍蝗皆人海死每旱禱雨輒應有一村不雨廉得妻殺夫冤人尤異之淮賊喬亮猖狂捕不獲過鹽城當道責諒捕之亮聞曰毋累賢父母自投聽解出境仍亡入海九載考績民不忍舍復留三年致仕歸見分省人物考祀鄉賢祠徐鏞字用和永章里人成化五年進士授行人擢監察御史巡視通州奏定漕卒輓輸章程著爲令人便之時濬大通河鏞獨疏不可旣而漕舟果不達按閩還以災異論列却貢獻正課程革奸弊均祿食四事與同官共劾太監汪直八罪並其黨王越陳

鉞諸人直等遂得罪又極論名器之濫請汰冗官會地震修省  
旋舉慶成宴鏞以非上下交修之義請罷之謫鎮原令值歲饑  
修預備倉掘地得窖錢十萬悉周貧乏及代流亡輸累歲逋課  
宏治初擢知淮安府轉廣西參政河南布政後總督漕運持法  
糾邪軍民沾惠卒賜祭葬見明史紀事本末及楚紀○湖廣通志祀鄉賢祠  
徐鈺字用礪鏞弟宏治九年進士武宗時中官橫恣與御史趙佑  
朱廷聲交章極論為閹黨勒罷劉瑾誅後鈺復起終四川布政  
使見明史趙佑傳○舊志載鈺弱冠使交趾烹猩猩以獻鈺舉箸抉兩目啖之交人懼服云云按猩猩美在唇不在目也且  
祇此一事何必作傳今特刪之而錄明史所載以表其大者

興國州志 卷二十 名賢

劉珂字公佩興教里人宏治九年進士吳寬薦為南直隸長洲知  
縣崇學校除盜賊墾民田三千餘畝興水利七百一十處置義  
塚三毀淫祠十復流亡三百餘戶貯賑米一萬一千餘石修橋  
梁四十座工部奏徵郡屬雇役濬河錢珂力言於當道疏請歲  
省費不下十餘萬補太僕寺丞奏草本寺丞四員陳備邊水利  
八事又陳邊務七事及劉瑾柄政乞歸不治生產賑窮乏家居  
二十餘年卒見分省人物考萬歷戊寅知州楊士元題祀鄉賢祠  
鍾湘字用秀修善里人太昌簿鉞子宏治十五年進士授戶部郎  
中擢知漳州府會粵省山寇倡亂詔閩撫合兵勦之兵屯其境



芻粟之費日不下數百金悍卒不可法御湘區畫誓戒皆有法  
度率死士搗巢穴縛首惡以獻脅從者給牛粟遣之賊感泣皆  
就降以功進階三品祿視參政歲飢賑濟有方活數萬口嬰疾  
篤庫有羨餘數千兩攝篆者欲私分之湘曰汝欲以此污吾名  
節耶悉登之簿籍擢廣東參政未行卒

見分省人物考

祀鄉賢祠

劉守緒字克承興教里人正德九年進士爲江西奉新知縣十四  
年從提督都御史王守仁勦宸濠時濠自攻安慶伏賊千餘於  
新舊墳廠以備省城之援守緒奉檄同典史徐誠領兵四百從  
間道夜襲破之以搖城中踰二日大軍遂攻破省城宸濠解安

興國州志

卷二十名賢

九

慶之圍來援守仁復遣知府伍文定等分道並進並遣守緒等  
各領兵百餘張疑設伏待文定等兵交然後四起合擊遂敗宸  
濠揜之守緒護檻車隨守仁至杭州付太監張永守仁奏稱守  
緒等效績輸能亦有等列然皆首從義師爭赴國難協謀併力  
共收全功請加爵賞旌擢以勸天下之忠義其後咨開功次守  
緒列二等累遷太僕寺卿祀鄉賢祠

吳國倫字明卿嘉靖己酉領解額庚戌成進士由中書舍人擢兵  
科給事中與李攀龍王世貞宗臣徐中行梁有譽謝榛稱嘉靖  
七子時嚴嵩柄政楊繼盛疏斥其奸詔下獄臨刑國倫與王世

貞宗臣往哭西市倡衆賻送嵩假他事謫江西按察司知事量移南康推官調歸德居二歲棄官歸嵩敗起建甯同知遷邵武府知府調廣東高州府值山海二寇合勢攻城國倫悉力防禦以平賊功擢貴州提學僉事轉河南參政大計罷歸四方求文之士不東走太倉則西走興國世貞旣沒國倫猶無恙在七子中最爲老壽

見明史文苑傳

萬曆甲寅知州高維岳題祀鄉賢祠

劉師穎字方回興教里人性穎慧七歲能屬詞稱神童十三就試學使拔冠軍荆藩聞而致幣請爲儀賓却之曰非吾志也嘉靖庚子舉於鄉癸丑成進士廷試當列鼎甲相臣嚴嵩意有所屬

興國州志

卷二十 名賢

十

抑置二甲授兵部主事提督武學屢上書言軍政又奉命發輜車餉邊及赴雲中兌塞馬一切用軍興法所過不擾遷職方司監脩大城會三殿災從大司馬分董大工著有成績賜白金文綺勞之尋擢武選司郎中以病告歸

見明一統志

師穎生平直諒冲虛事母孝不交有司子之斗傳其遺詩行世萬曆戊寅知州楊士元題祀鄉賢祠

宦績

宋

吳鶚太宗雍熙二年進士初任黃州司理參軍以薦擢通州判官會歲飢河朔流民轉徙失業鶚奉命招復民獲安集課最遷大理寺丞卒官龍圖閣直學士

吳幾復仁宗天聖二年進士知蓬州多惠政任滿去父老拜庭下曰被使君惠久矣鄉民不敢輕至今聞還朝故來相送且歌曰使君來兮父母鞠我禮化行兮無寒餓使君去兮復畱不可意悵悵兮淚雙墮祀鄉賢祠

興國州志

卷二十 宦績

十一

吳審禮嗣復子仁宗皇祐元年進士爲瑞昌令後知辰州獯人數爲寇審禮以誠信結之一境晏然比去獯人復爲寇詔復任在辰十年境無一警祀鄉賢祠

吳彥夔高宗紹興十八年進士歷任江寧縣尉武寧縣令

見武寧縣志

通判荆南府後知廣南韶州州軍事兼提點銀銅坑治州多淫祠婦人喪夫悉送僧寺彥夔嚴禁之在韶二年廉名特著歸舟惟載廣藤一條長數十丈必大其子也

明

劉英字朝英元至正二十三年明太祖取興國改興國路爲興國

府授英爲知府英建公署築城防有能績後以事左遷福州府同知祀鄉賢祠

王則大字時廣洪武二十一年以薦舉知福建福清縣蒞事精白復以廉能薦召見赴京卒於道

劉仕榮字朝臣興教里人永樂七年以人才選授四川敘州府宜賓縣驛丞勤慎有聲遷福建福州府巡檢潔己愛民屢膺上考卒於任

石斌字冬一辛安里人明正統間貢生任江南清河縣知縣單車就道不攜眷屬廉清自矢行橐蕭然尋卒於官家貧子弱遂旅

興國州志

卷二十 宦績

十二

葬治所

馮本字明德宣化里人博學清才甫冠舉宏治八年鄉試初任四川華陽縣知縣有惠政繼知蓬溪蓬溪固無城本至亟繕之縣民始得所恃後擢雲南嵩明州知州卒官雲南僉事

周啟東字意魯閩莆田人父禮官荆王府紀善遂占籍興國啟東中宏治辛酉鄉舉官江南涇縣知縣寬和清潔甫考成卽勇退會知州胡瀛改創學宮思得其所居地而廣之東無難色因以桑棗園易焉子包茅嘉靖辛酉歲貢仁和教諭包荒另有傳

劉守愚字克明興教里人州學生舉正德庚午鄉試丁丑進士初

知江西浮梁縣事案無留牘士民頌之有御史某構里人守愚履勘訟地得其情竟不直之任南昌司馬時有都御史家居者特旨起用縣申其母老不能遠離守愚責以忠強之出在任以公正廉明聞官終南京刑部員外郎

周包荒字練江啟東子嘉靖七年舉人任四川江津縣知縣調鄆都擢涪州知州料理麻陽軍務敘功擢重慶府知府致仕

舊志云包

荒令上部入名宦按上部今不知何地

徐綱字立之慈口里人父興漢好施予蚤世綱甫十齡母黃氏守節嘉靖十年以白衣錄賢書二十三年登進士除陝西西安司

興國州志

卷二十 宦績

十三

理每多平反擢兵科給事中值虜深入奉勅往宣大等處查勘邊務不激不縱晉吏科都給事中世廟建醮命在廷諸人黃冠行香公極諫廷杖瀕死復諫乃止歷任南京鴻臚寺太僕寺光祿寺及北京光祿寺卿順天府尹

舊志京兆尹乃漢代官非明代官今依省志更正

晉

工部左右侍郎奉督大石窩修理元都殿永陵兼朝宗橋等大工屢沐恩賚並蔭其子萬曆改元不阿權相致仕越歲復除本部尙書不就三年卒賜葬於福慶里之先賢山綱爲人正直端方寬和樂易所居不務赫赫名而所在見德所去見思巡按舒鰲李枋節薦境內人材謂綱立朝騰正直忠厚之聲居家著簡

重清修之譽素履不逾於晚節典型允屬於老成數言可見大概云祀鄉賢祠

劉壽嶠字景仁朝陽里人嘉靖十年舉于鄉授四川儀隴知縣移攝大竹以廉能遷南昌府同知兩邑爭畱不可各立祠祀之西昌有熊生恃嚴相戚侵鄉人田羣愬諸上官上官心不直熊生而卒莫能爲鄉人地移嶠鞫之召生叱曰若倚相公勢耶命鞭之悉還所侵田因奏記乞休會以王命採木行旣竣事持羨金千餘還公帑遂飄然納綬去祀鄉賢祠

劉儲字文英壽嶠從子舉嘉靖二十五年鄉試屢上春官不第謁興國州志

卷二十 宦績

十四

選得江西瑞昌縣已用薦者言改直隸唐山縣又用薦者言召補北城兵馬司正指揮尋以事忤中貴人出爲雲南晉甯州知

州

據吳國倫集補錄○唐山作柏人按柏人漢時地名在明爲唐山今據○一統志表更正

葉棣嘉靖三十四年舉人任江西武寧縣知縣有廉仁之頌時城址爲江水所嚙久廢不治棣慨然議築踰年功成屹然爲一巨鎮後遷兩淮運判

據武寧縣志補錄

華存禮字泰峯春盛子嘉靖四十三年舉人初知南直隸桃源縣愛民如子引淮水溉民田民德之作生祠於河上署聯云千年會合黃淮水萬姓瞻依華泰峯

舊志

行取戶部主事累陞員外郎

雲南大理府知府金騰道兵備副使布政使司署巡撫七十一  
致仕八十六卒 見存禮墓碑 祀鄉賢祠

劉文定字子靜興教里人萬曆元年舉人官黃岡縣教諭謙冲恬

雅不愧師範

據黃岡志循良傳補入

擢六合知縣縣故衝繁疲敝一意休

息不獵聲譽有巨盜爲害公善除之縣人感其德立祠祀之遷  
陝西甯州知州以母老乞養歸祀鄉賢祠

黃士吉字元甫興教里人爲諸生時豪宕負俠舉萬曆壬午鄉試  
授建昌教諭壬辰成進士任工部員外郎督造清甯兩宮神宗  
勞之御書半窗明月以賜庚子典試貴州任浙江提學道仕宦

興國州志

卷二十 宦績

十五

十年僅中人產創興國會館於京師崇文門外東草場第四條  
衢衢公車北上者德之所著有元雲閣稿

曹志遇字稚孚永城里人年甫冠舉萬曆壬午鄉試戊戌成進士  
除戶部主事視河西關務潔白自持繼司餉徐州出守巴渝會  
蹇尙書子不法按如律鄉人有爲其屬吏者以墨聞不爲私覆  
再守廣東高州高故瀕海值島夷猖獗殄滅之疆圉晏然高志  
蝨蝕捐俸纂修舉墜釐廢功施爛如遷羅定道致仕歸築大美  
堂於箕山之陽課子訓孫足跡不涉城市卒之日囊無餘錙著  
有萬蕉亭稿祀鄉賢祠子景參

徐汝化字應時萬曆十年舉於鄉博極羣書工詞賦與吳明卿倡和有青桂社稿性孝友築愛日堂以娛親事伯兄汝器有灼艾風令河間政教爲當世重以丁艱疾卒祀鄉賢祠

孫敏政字見蒲尊賢坊人舉萬曆十三年鄉試選隨州學正陞南京國子監助教累遷四川重慶同知貴州遵義府知府兩淮都轉鹽運使守遵義時絕苞苴鋤刁健倡議捐修隄防民至今利

賴焉

據遵義府志補錄

石炬字石門宣化里人萬曆三十五年進士南京工部清水司主事管夏鎮聞啟閉以時有要人舟次夏鎮命啟聞不聽淹留旬

與國州志

卷二十 宦績

十六

日心銜之竟罷歸卒祀鄉賢

劉師孔字伯時興教里人歲貢生司訓惠州月吉講課惟尙樸學誨諸生一以敦行爲先士風丕變皇甫少參煥深嘉之委署博羅縣事訟理惠敷遷四川閬中教諭去之日士紳祖餞父老攀轅未至蜀便道歸里卒於家

劉之待字世聘興教里人萬曆丙辰進士初授松江府推官行取御史巡按浙江性伉直與楊太保漣先後疏劾魏璫革職時稱忠烈崇禎二年復官府志有傳疏載文錄

潘師道字太乙辛亭里人舉萬曆丁酉鄉試癸丑成進士歷任大



理寺評事戶部福建清吏司員外郎出知福建邵武府調福州府福州大旱師道多方賑恤禱雨輒應福人爲作靈雨亭紀其事太學士福清葉向高稱其飲冰茹蘗愛民如子爲二百年來守郡所僅見遷浙江布政使司右參政四川按察使或云遷浙江布政使署巡撫事歸卒祀鄉賢舊志雖列鄉賢官階僅書四按察使事實並無一字今從潘氏誥封碑中採錄官階從葉文忠公文中採錄事實至崇祀鄉賢朝代仍不可考

梁招孟字良山懷仁里人舉萬曆壬子鄉試第二崇禎戊辰成進士由內閣中書遷江西道監察御史改南京戶部郎出知廣東惠州府會肇慶兵衡決巡撫某分常股之一安插於惠惠民難

興國州志

卷二十 宦績

十七

之招孟榜諭再三冀相安於無事無何磨旗唱楯勢如沸招孟以計縛判卒四百餘人惠民遂獲安堵又值烏禽山賊起當事檄署嶺東兵備道兼監軍事招孟條上征山事宜申明紀律探賊所出沒險要及官軍進勦臨機應變受其指者所向輒破賊遂殄已而擢淮海巡道歷任江西驛鹽道署山西按察使司所至皆有政聲尋爲兩浙都轉鹽運使值明鼎革遂解組歸自號息阿著有息阿山房文集據盧庭琮所撰傳補錄

馮之圖字書先永城里人負文名中萬曆戊午副榜興陳際泰黎元寬諸人遊天啟丁卯舉鄉試崇禎甲戌成進士任戶部主事

署郎中事時設新餉司收兌無成法運戶弗便之圖察其弊有到卽收無許畱難一時中飽者斂迹通惠河水涸漕艘不前之圖至天津督之懷宗書其名於屏旋擢漳南道參議會武平清流山寇竊發撫軍主勦之圖推至誠撫之兼攝守道駐節海上晝夜戒嚴沿海以安一時有廉幹稱而風節矯矯大計竟謫官歸明季地方不靖有鄭大發踞太平山作亂之圖偕下江防道洪天擢平之當事屢薦不起自號鹿門老樵卒年八十七著有谿聲堂制藝易老堂詩文集行世 國朝康熙十九年湖廣巡撫張朝珍奏請崇祀鄉賢祠

興國州志

卷二十 宦績

十八

國朝

盧高字遠心宣化里人性穎異卅角食餼家貧力學博通經史百家言順治辛卯壬辰鄉會聯捷選庶吉士授檢討乙未試加一級外轉浙江驛鹽道署杭嚴道鹽運司按察司事不延一幕游刃有餘戍戍以疾致仕所餘清俸置產給宗族又置各莊義田各十餘石歸林七年終年四十三著有泊舟草翠環堂詩集說郭子四以劭歲貢生

方師誨字忠焉長慶里人順治九年進士任山西定襄縣知縣值歲飢屢詳請賑恤居官廉介紙帳布被沒於任貧至不能具棺

康熙三十五年湖廣總督吳璵疏請崇祀鄉賢著有四書補疏  
諸史提論

袁良陞字亦山修善里人少儻善決事順治初楚南北軍書旁  
午經畧洪承疇聞其才辟就幕府獻書萬言洪大悅畱參軍務  
委署茶陵屯田奏功擢長沙通判委以支放持籌六省刻期立  
辦□沅巡撫袁廓宇倚爲臂指事平敘功擢陝西慶陽府同知  
駐劄靈州州苦河決禱於神而河遂徙修鑿漢唐二渠灌溉可  
資萬頃兩護甯夏道報最列上考丁艱歸遂不復仕子承楚字  
念湘北直隸完縣知縣承秦字念渭初爲廣東東安縣知縣粵

興國州志

卷二十 宦績

十九

例州縣編審民間約費千金公用外長吏可得其半承秦白之  
撫憲請除之遷貴州開州牧州界苗蠻明始建置未立教職承  
秦甫下車卽詳請題允乃捐廉倡建學宮由是文風丕變苗悉  
向化開屬有硃砂水銀三廠曰用砂曰斗甫曰白馬利之所在  
人爭趨焉因之命盜迭見承秦力請封閉民患乃息

袁良怡字棣菴援例入仕初任福建將樂知縣時蝗爲田害良怡  
徒跣露禱蝗蝻遂絕後陞河曲州知州廣平府同知所至俱有  
政績民號袁活佛云

雷作霖字蘇生以辟舉授浙江平湖知縣愛民如子培植士類秩

滿歸林與從弟作和詩酒倡和飄然塵俗之外

馮俞昌字曰俞之圖子順治五年歲貢授江陵縣訓導遷直隸容城知縣後補福建同安知縣時大兵征臺灣躬督軍需捐俸以恤窮詹閩民謳思如戴父母以疾致仕棲遲山莊不入城市年八十有二卒

吳景祉字二來宣化坊人順治十二年進士知江西南豐縣焚香告天廉隅自勵或勸其稍自潤曰視作秀才時何如而尙求贏也及罷官貧不能治裝子甫生領解始歸里年八十餘卒

張翰揚字伯鷹尊賢坊人令聞子幼以敏聞每爲文意與境會未

興國州志

卷二十 宦績

二十

嘗起草富於史學上下古今所擬制策奏議俱期有用於時舉順治辛卯鄉試乙未成進士授戶部主事典視德州及臨清倉務數上大司農書數陳利弊甚悉時倉儲多逋前官或已報而未足州縣或已赦而復徵十數年來紛拏轆轤翰揚乃設法清理俾官民掛欠俱獲彌補或謂君司出納曷不自爲利翰揚曰無損於國有益於民又可了前官事烏用自利爲遷四川司郎中以上疏言事降調初補太原府同知明年缺裁補南昌府通判所至存心利物旋牽意外累解任赴勘事白將謁選以疾卒翰揚性倜儻好施予人多頌其義卒年三十九無嗣論者不

能無憾於天道云所著有樂言莊集小草廬集華遊集燕歌蠡草諸篇其雁字百詠尤爲膾炙人口

陳愚字智若永福里人父仲謀助餉載義行愚生而穎悟有神童之目康熙八年中鄉試第二初任荊門州學正遷四川遂甯縣知縣遂甯賦額舊七千兵燹後民戶凋殘部檄清丈將復其舊民皇皇思逃愚曰有我在必不重累吾民晝夜經畫□多益寡視舊額三十之一民志乃定未幾奉令招墾民多爭訟愚履畝編甲增二千餘戶遠人如歸而邑無土滿之患城久隕以贖鍰並捐俸次第修築兼修學宮工成而民不擾邑人唐某令楚時

興國州志

卷二十 宦績

二十一

筦軍需事定核銷應賠十八萬兩有奇愚憫其已故妻子困窮會赦詳請豁免僅免其半再請格於部以是鬱鬱遂卒位不滿德人皆惜之所學邃於易著有易經統集餘古堂集聞見錄四書纂要歷代帝王規鑒錄明進士呂潛志其墓

吳甫生字宣臣景祉子天姿英敏過目不忘康熙三十三年進士選庶吉士散館日試墨藝詩甫生有俱有丹心依絳闕獨將鐵面上烏臺之句 上深賞之改御史掌京畿道兼登聞院事立朝蹇諤不事嬖阿而河工一疏尤覘風裁壬午典試陝西復命日 御書金山夜月詩以賜甲申告歸僦居漢陽惟日飲酒

賦詩焉著有列女傳續甌甌洞稿若干卷卒之日橐無遺金按謹

乾隆十八年始定御史爲從五品其在康熙年間尙係七品故當時庶常散館往往有授御史者並非超擢也

袁守待字紹宏修善里人康熙丙戌進士知山西靈石縣甫下車值大旱禱介子廟甘霖立沛時軍需旁午正供外一不擾民吏部尙書嵇曾筠贈詩有盡力勤王事留心察庶情之句丁酉爲同考官稱爲得士卒於官

徐學榜字石洲慈口里人康熙己丑進士知河南淇縣愛民如子獄無冤者尤振勵風教公餘進諸生課文藝邑有佳子弟輒引而教之兩爲同考官所取皆名下士辛丑淇大饑捐俸以賑民

興國州志

卷二十 宦績

二十二

賴全活於縣南門外立碑記之性廉介以病解任行李蕭然著有石洲文稿

柯時懋字建中東鄉里人父清瀛以孝旌時懋幼端慤每授書一再讀輒默坐叩之則已成誦矣少受知於學使潘公宗洛王先生汝驤主講江漢書院亦深賞之康熙丁酉舉于鄉乾隆丁巳恩科成進士年六十矣歸授徒其所爲教皆聖賢爲己之學又十年選授河南修武縣知縣下車訪民疾苦興利除弊孜孜如不及後以卓異薦未行卒於官修武士民如失慈父母焉

李應明字東輝豐葉里人舉雍正元年鄉試乾隆乙丑大桃一等

分發福建充丁卯科鄉試同考官歷署興化府潭州府通判莆田縣知縣補屏南屏南喬野喪祭禮多不具應明參考儀制訓示士民數月之間舊俗一變民感其化建祠祀之

謝家誥字繼典中豐樂里人雍正七年舉人授山西馬邑縣知縣甫下車值歲祲卽申請施賑全活甚衆縣之報災自家誥始著有學庸獻疑汲古詩文行世

程英銘字新三朝陽里人乾隆十三年進士授四川鄰水縣知縣有生員甘文林熊宗斐熊興誠等被誣擬大辟英銘廉其冤力救得釋文林後以庚辰成進士宗斐興誠皆由明經官教職當興國州志

卷二十 宦績

二十三

時美之詳鄰水縣志後官山東海縣邑爲乾隆初設規模未就到任次第舉行并捐俸教民種植阿大中丞嘉其留心樹蓄旋署曹州府通判亦有善政

趙鰲字東巨下豐樂里人雍正乙卯拔貢乾隆六年中順天鄉試聯捷成進士任山西襄垣縣知縣時襄垣大水冒暑勘災具報廉知小販入城者俱有私稅悉革之貧民稱便壬申爲鄉試同考官旋卒於署家人鬻肩輿以治棺鰲在家事親孝且能文渤海高鑒知興國時甚重之及卒哭以詩歷叙其生平才行云方立經字錦川長慶里人乾隆辛酉拔貢生甲子順天鄉試舉人

以教習期滿籤發山西知縣歷任珙縣榮河縣丁艱服闋改發直隸歷任涑水盧龍宣化諸縣宣化值歲飢大府以河工督餉急立經陳民間疾苦並寫元道州詩上幕府自以不稱職請罷大府感而稍緩宣化民賴以蘇遷昌平保安知州權順天西北兩路同知嘗以臨民者易任性遂自號耐亭旋擢湖南永州府知府再守直隸正定府所屬有以災告者必爲陳乞賑恤百姓圖像以祀焉護理口北道以失察被議奉 旨原品休致自念出仕三十年歷荷 恩眷歸里後每月朔旦必朝服望 闕叩謝云

葉脩贈字耘石陽辛里人乾隆十二年舉人辛巳大挑二等授黃梅縣教諭在任十餘年惟以陶成士類爲務黃梅數厄於水邑令屬行部勸捐監賑修堤心切民瘼不避艱辛秩滿保以知縣用不就初脩贈以舉人入都以蘆花詩得名人呼爲葉蘆花詩學陸放翁著有耘石草堂詩集書法亦秀勁

石玖光字辰川崇仁里人乾隆二十六年進士謁選得河南閩鄉縣縣多沙壤而東南近峪地宜泉西北臨河地可井教以疏鑿車庠之法民始知有水之利會 王師征金川承辦兵差事無誤而民不擾及聞凱旋大吏檄所過預備供頓慨然曰民憊矣



設兵不我過是以虛費困吾民也乃遣健步偵大軍則從潼關  
渡河闔鄉遂無所事民益德之邑舊患狼至是益肆齋戒爲文  
祭告山神患遂已去任狼復出父老焚前文致祭卽不爲害擢  
懷慶府通判歷署懷慶南陽府所至勤聽斷修書院人以福星  
稱之告歸十五年卒年七十八祀闔鄉名宦復祀本州鄉賢  
程才濂字尋溪英銘子乾隆三十六年舉人自少以才名著有活  
水園詩鈔大挑二等選漢陽教諭任滿考績畢制軍以可任民  
社保薦赴京選授山東城武縣知縣調荷澤縣以同知陞用荷  
澤界黃河時有水患才濂督夫役修築堤防遇災必請賑卹鄰  
邑亦爲之歌頌旋署濟甯州知州以年衰致仕

興國州志

卷二十 宦績

二十五

石時和字喈鳳崇仁里人乾隆五十三年舉人嘉慶戊辰大挑二  
等選南漳縣教諭內艱服闋補恩施縣教諭截取授廣東吳川  
縣知縣吳川濱海民風獷悍和清儉有威深懲奸蠹礪川司巡  
檢趙某縱胥脅斃民命和力去之約已便民縣無留獄在任三  
年民安其政歲終獻采薪者充庭榜市門曰官清民樂建生祠  
於黃陂墟歲時致祝

石時桀字傳方玖光孫乾隆己酉舉人考取覺羅官學教習嘉慶  
丙辰成進士改翰林院庶吉士散館改主事籤分刑部歎曰人

生不幸乃爲刑官每遇讞獄必悉心求得其情性質直不能與時俯仰遇疑獄輒侃侃與上官爭亦以是淹滯在刑曹二十年積資平進歷員外郎郎中道光元年始擢山東道監察御史轉四川道所上疏如疏通銓政禁止開墾皆切中時弊嘗奉命稽查京倉有家丁索得陋規卽逐之踰年以病歸生平無他嗜惟嗜酒每與人飲酣暢淋漓不知富貴爲何物也

陳治策字耘蕙仁義里人少負奇氣文亦如之食餼後困諸生者三十年嘉慶四年充歲貢是年恩科聯捷成進士以知縣籤發浙江授處州雲和縣雲和地瘠農復惰窳治策起家寒峻知

興國州志

卷二十 宦績

二十六

穡事每循行阡陌教以種植之宜澹洩之法民率而行之間遇旱潦他邑告歉而雲和獨無害其爲政務達民隱每坐堂皇至者輒使前問所患苦婦孺皆得各言其情或下鄉履勘公事徐與百姓言孝弟媿睦之道勤勤懇懇有若家人相告語者縣署火遠鄉僻壤來弔唁越數日輸木石瓴甃者輸錢米者閱兩月而署成性孤峭自言非用世才告歸百姓畱之不得乃相與立生祠立去思碑旣歸苦貧請改教職授德安府教授學使鮑侍郎檄知府聘主漢東書院從學數百人時比之趙江漢先生云所著有盤谷山房詩集七卷文集五卷行于世同治七年州人

士呈請崇祀鄉賢

潘觀藻原名光藻字賓石長慶里人少孤母陳氏矢志食貧教之成立觀藻博學能文舉嘉慶庚午鄉試第二丁丑成進士改翰林院庶吉士己卯授編修乙酉督學四川任滿因事左遷乙未援例以知府分發浙江初署金華再署衢州詳裁龍游開化兩縣辦漕陋規再署處州決縉雲縣鄭姓兄弟爭產獄褫劣紳之唆訟者一縣快之補台州台屬產罌粟花以熬鴉片烟獲厚利時方令所在拔除臨海知縣某以操切致變上官檄觀藻督捕犯皆遠颺逐被劾歸里遇事之有益於族黨者知無不爲值崇

興國州志

卷二十 宦績

二十七

陽鍾人杰戕官謀叛有觀兵興國之意觀藻倡捐千緡募勇守通山界賊旋平居恆念母氏苦節言之輒泫然在台州時倡建勵節堂籌費分給節婦之貧苦者咸豐辛亥州人士修節孝祠獨捐建門外石坊具見不匱之孝思云

成錫慶字子勃尊賢坊人嘉慶二十三年 恩科舉人道光丙戌大挑一等分發江蘇省歷署宜興奉賢奉賢多命案差保地棍借端勒派鄉民輒破家錫慶嚴禁之前任楊本初偕紳士立同善堂遇命案借錢爲費錫慶至捐廉襄助申明規條民甚德之去曰供長生祿位於同善堂後補蕭縣以事左遷罷歸居林下

者廿年嘗言爲官甚苦妻子之言都不敢聽亦足見其廉勤矣  
方炳文字雲石長慶里人六世祖師誨祀鄉賢父敦臨庠生客陝  
西值白蓮教起罵賊遇害炳文年十二隨母間關歸幾無以爲  
生而刻苦力學爲文戛戛獨造道光六年成進士以知縣分發  
湖南署鄱縣有府胥以事至嚇取民財執而杖之曰吾甯忤上  
官不忍若輩之賸我民也每聽訟務以誠感有母訴其子者反  
覆開示已而責其子曰吾欲養而無親汝有親而不養乎聲淚  
俱下子感動哭投母懷母亦泣遂爲母子如初補甯鄉值湖南  
北大水流民多在境捐俸倡賑勸富室助之資送以歸所全活  
甚衆在甯鄉五年不輕入人罪而捕誅胡十二俞十四等十數  
人則皆擾害鄉里前令屢捕而不獲者也後調善化以卓異送  
部引 見卒於都

李煒原名克洧字蘭舟豐葉里人天資明敏舉道光十四年鄉試  
二十年 恩科成進士以知縣分發陝西歷署山陽城固岐山  
富平咸陽咸甯縣事所至有聲巡撫林文忠公稱爲關中良吏  
第一丁外艱歸咸豐元年起復補富平調長安十年署商州同  
治元年粵逆竄陝甫經大軍擊退而回民搆釁滋事時煒已回  
長安任籌度情形分別良莠請於上憲勦撫兼施親歷鄉鎮諭

居民舉辦團練聯絡聲勢以自固其圍復設法安插難民民皆德之方事之殷各省兵麇至一切供張當事者皆倚煒取辦事平錄其勞以知府保升檄署同州府未赴任卒

秦榮字仔仁恭武公從子也髫齡嗜學弱冠淹通經史試闈場文名藉甚爲人沈毅多畧福艾竒龐羣以國器目之咸豐元年以例貢生隨恭武追勦粵匪累功洊保知府九年巡撫翁同書檄統水陸兵勇值捻逆張落刑犯張家溝榮以水師會步隊敗之連毀北岸賊壘復懷遠城 賞加道銜又率水師克復臨淮進攻鳳陽以功 賞戴花翎署鳳陽知府時捻逆勾髮賊圍鳳陽

興國州志

卷二十 宦績

二十九

造雲梯百計攻撲榮登陴巡守飛礮洞帽中從兵斃焉左右皆股栗榮神色不變旋出奇擊退之乃買牛開墾設棧銷鹽爲善後計城賴以安事聞 賞加鹽運使銜以道員記名簡放 欽差大臣袁甲三檄辦糧臺兼護理安徽布政使印務人頌其德爲勒碑於鳳之昭忠祠同治二年以病歸卒於家

方翊元原名海涵字子白幼沈靜長隨伯父炳文任湖南令與湘中諸名宿遊肆力爲古文辭歸遊於庠旋食餼閉戶讀書凡有裨於 國計民生者莫不討究以期見用於時咸豐三年粵匪竄州明年曾文正公以兵部侍郎督師討賊恢復江漢翊元往

謁曾公異之留置幕府往來各大帥營遇事敢言莫不推誠相與以功擢訓導保知縣 賞戴藍翎同治元年大軍克復和州曾公謂此州淪於賊且十年非得良吏撫綏之不可檄翊元往至則請支餉並捐俸修築銅城關以扞一州水患又請買牛給種招集流亡俾民漸復其業本年賊由九洑洲渡江上竄大府檄翊元入西梁山營同官軍固守及賊退回任則地方凋劫益甚向所興利皆廢矣憂勞之餘遂得心疾歸里卒翊元性惻怛喪亂以來調恤困苦而自守確然雖一介未嘗妄取云所著有師非我齋文集四卷詩集十二卷駢體文二卷駐春軒詩話四

宦績 增補

劉晉元字繼梅興教里人雍正丁未進士知山西武寨縣事武寨巖邑也捕務訟件旁午紛沓晉元措理裕如丁母憂去父老攀留泣涕不忍別上官聞而嘆曰劉令誠良有司也在家與修邑乘服闋補阜平嘗卻李姓金有少尉歿貧不能治喪出貲殮而窆之未一載卒於任同寅賻助始得歸櫬其操守可知矣

劉傳經字心蓮興教里人以從九分發甘肅署平羅縣典史補固原州吏目固原羗戎雜處號難治傳經恩威互用甚得民心以年壯才明辦事勤奮調任伊犁霍爾果斯巡檢松將軍筠深器之  
之手書求謙字以贈俸滿例得保擢以親憂歸時年方五十遂優游終老於家蓋澹泊之志素定云

興國州志

卷二十 宦績

三十一

劉鳴盛字鳳岡興教里人監生應順天試不售援例以縣丞分發福建署邵武禾坪縣丞禾坪分轄十二都歲無麥徧野鴻嗷遂議平糶向章平糶甲米期定六七兩月鳴盛變通辦理起四月訖七月每升米價十七文間日開糶以兩月之米延濟四月飢民大便旋補晉江石獅縣丞代理泰甯同安等縣事同安海豐赤緊甫蒞任即革陋規釐積案士民德之咸豐間勦辦粵匪捐金助餉加五品銜并得二代封典著有和聲詩集四卷子灼著

有花萼山房詩鈔赤壁遊草克世其家云

余以增字春屏宣化坊人幼讀父書少長爲邑學聞諸生壯取秋解大挑一等以知縣籤發浙江初署富陽再署桐鄉治皆最尋補長興令書院陋且陟增至葺而廓之月氣數百人歲警水民多流亡增捐俸粟乏餓續羸寒富室從臾助之訾活無竿縣濱大湖故藪盜增梟其渠餘悉解歸農轉歷烏程孝豐諸暨江山等縣在官無赫赫名而去後恒見思

陳光亨字秋門興教里人幼穎異明大義由翰林編修累遷御史給事中立朝剛方彈劾不避權貴年五十乞養歸里值軍興奉興國州志

卷二十 宦績

三十二

旨督辦團練與曾文正官文恭胡文忠往復函商防堵事宜在本邑勸集饟捐二十餘萬加廣學額又商定漕規積弊永除州中殘廢多所興復爲人清廉正直平易近人主講富川書院十餘年文風丕振士民德之擬請崇祀鄉賢以格於新例年限遲之奏議載文錄子皖諸生



宦績 又增

石亨澈字玉溪玖光子乾隆癸亥舉人任穀城訓導課士勤密時教匪滋擾邑令公出城被圍者旬餘亨澈躬率紳民登陴固守匪退令返讓功不居因礮震重聽告歸著有環山書屋文集

劉輝字耘松幼有孝性予棗橘必懷以遺母舉乙未鄉試大挑選應城訓導司鐸十餘年文風丕振粵匪之亂與縣令王辦團勸捐賊撲城輝督團擊却之有陳生因案牽累上憲札取年貌輝白其冤得不褫旋以疾告歸著有最樂堂詩集子振藻五品銜

孫紀諸生

興國州志

卷二十 宦績

三十三

石會昌字芝生亨澈孫庭葵子領咸豐己未鄉薦同治壬戌成進士分發四川署崇慶懲刁俗民稱便又署梁山苦雨會昌禁燒熬以禱立霽李傅相鴻章入蜀時道經梁山索閱案卷稱其實心愛民剛而不激介而能通許爲名吏充甲子丁卯庚午同考官得士最盛丁母憂回籍捐祭費贍族黨服闋仍歸原省署榮昌授榮經所至有循聲前後在讞局訊結不下千案告疾歸越五年卒

易亨字禮臣尊賢坊人積學工書以優貢充教習俸滿分發陝西歷署沔鳳宜川永壽鎮安等縣其在宜川也會菑旱便宜出官

粟平價予糶無力者蠲俸賑之屋流離櫓露殍行之數月天乃  
雨歲則大熟回逆之變調省辦防以功加運同銜子壽崧亦以  
功擢新疆牧人謂易氏家傳治譜云

柯掄字健菴興瑞里人同治癸亥進士宰閩之壽甯福鼎儉以助  
廉有疑獄輒微行廉得其實治之民以不冤總督李鶴年以閩  
省第一賢員聞解組歸主講富川書院裁成後進孜孜不倦卒  
於家

文學

宋

李翔字仲覽元豐八年進士多學善吟為諸生時蘇軾由黃州量

移汝州將溯大江逆西江適筠州即今瑞州府視其弟轍知軍楊繪

命翔往迎至興國後翔登第建懷坡閣以寓思焉湖廣通志祀鄉賢祠○舊

志云軾謫黃州每過訪之未詳所出今據王質雪山集改正

元

梁廷鳳字儀甫懷仁里人偉容儀善談論為思恩簿任滿歸宿林

叔大家談論鋒起叔大語人曰此百疊山中第一人也功名豈

興國州志 卷二十 文學

三十五

易量哉祀鄉賢祠此舊志原文其他事實並無可考姑錄於此

馬鏞字迪堅辛安里人師廬陵彭士奇先生至正己丑以茂異授

沅州學正遷本郡教授郡人敬畏嘗作理本書又修富川志未

成而卒祀鄉賢祠

明

馬濤字用舟鏞次子洪武間辟舉本州儒學典訓嘗慨父修志未

就後遷霸州學正得遊元書府求錄李壽朋舊志因續成焉卒

官河南嵩縣知縣祀鄉賢祠

俞彧字文彧錢塘人洪武中以先世事謫居興國號瓠落子有軒

曰瓜軒自爲傳記嘗施藥濟貧建言除佛老寓疊山數十年以詩文自娛不求人知有疊山錄三卷無子不復娶依弟以老嘗高歌咄然若雷鳴涇谷人聽其音以卜休咎按俞或撰興國州志序云郡守錢公

貳守汪公屬予以郡志予辭以寄寓不能悉風土事實又自作瓠落子傳云錢塘人以先世事謫居興國寓疊山東麓數十年

據此當入流寓舊志云入祀鄉賢今仍列人物志

司守謙字益甫宣化里人天才超逸下筆萬言與吳國倫同時相倡和年二十餘以諸生賫志沒詩文散逸獨存訓蒙駢句一卷然才子司川伯之名至今猶嘖嘖人口也

易應斗字太乙尊賢坊人萬曆壬辰年選爲拔貢生庚子科中南

興國州志

卷二十 文學

三十六

京副榜癸卯科中本省副榜任廣西永福縣知縣居官有守歸里能施崇禎二年修州志著有燕粵吟帑槐閣稿

余自強字弱生宣化坊人有光子增監生值明季擾攘有欲舉之者辭不出著有烽殘草蒼迴堂夜雨齋諸稿與鍾伯敬譚友夏遊詩亦近之

張應世字用甫尊賢坊人廩生生有異稟肆力於古設教三十年究心易理一時學者奉若蓍龜著有河洛集說及匡鼎詩說鑑性彙纂集史略等書家貧好周人急丁亥歲祲將所得館穀百石悉以賑飢子令聞舊志列入義士今改入

國朝

張令聞字譽公崇禎丙子舉人爲孝感教諭以學行引翼士類又任荊門州學正秩滿遷四川珙縣知縣以子翰揚貴不赴學問淹博書法奇古所著有澗水吟等集歸林四十餘年郡守以下皆師事之年九十三無疾卒子翰揚翰扶

俞慶維字孔彰宣化坊人弱冠遊庠每試輒冠其曹順治間學使者黃澍奉 詔選國子生得慶維卷詫爲奇才榜其卷於國門一時名噪楚北貢入大學謁大司成曹公與語奇之曰如君者非有求於某某固有資於君者也爾後不復以師生見宰相余興國州志

卷二十 文學

三十七

國柱故人也聞其至京喜曰是必來久之不至一日遇於衢載與俱歸語次以微語嘗之曰三十年老明經始得一州縣職耶下應一宿去明旦偵之則已束裝歸矣越十餘年復入都得州判職又不就歸益窘迫所居室不蔽風雨晚年改號輻衡子褐衣蔬食以明經終慶維於書無不通書法逼近懷素得酒輒書書無恒語口占手揮頃刻千言各有意致似不從人間來者至今人皆寶之

余士禴字澹菴宣化坊人父應鵬學行醇茂禴率庭訓沈潛經史而屢困棘闈僅中副車教授生徒問字者無虛日子文潔文清

張異卿字以同修淨里人博通經史爲文不趨俗徑以歲貢官四  
川綿竹縣知縣工詩著有姑溪近草諸稿膾炙人口

余振業字鴻期宜化坊人有光孫與同懷弟振鉞有聲藝苑黃岡  
王宗伯澤宏視學順天延襄校閱拔識多名俊康熙四年與修  
州志傳記多出其手以歲貢授湖南安仁縣訓導安仁兵燹後  
絃誦久廢比至殷勤勸課士風丕變卒于任

鍾良知字在格修善里人康熙己酉舉人授湖南善化教諭倣蘇  
湖學規訓迪諸生人文蔚起庚午爲雲南同考官解元尹泰庶  
常趙宸輔皆出其門癸酉興國大旱覽家書流涕因傾囊買穀

興國州志

卷二十 文學

三十八

三百餘石泛舟歸給鄉里至今稱義舉焉按康熙雍正間大比之年聘取鄰省舉人教職之有文名者爲同考官故良知以教諭爲滇同考官也

瞿學元字悅齋之俊子十歲失怙母吳氏教以義方康熙己卯以  
第二名領鄉薦授耒陽教諭修葺學宮勤於講學受業者甚多  
謝文通字方江父廷聖州中名宿通承家學志行皎潔與後輩燕  
見雖盛暑必肅衣冠凡才氣自豪者對之躁氣頓消康熙己卯  
舉于鄉授漢陽縣教諭未任卒

梁郊孟字浚來懷仁里人十歲能文十六入泮旋食餼與兄有孟  
受知學使邱公康熙戊子登賢書立品清峻學問淹通著有四

書大易授徒錄武黃間學者多取法焉

李應熙字緝安康熙庚子舉人宗人府正藍旗官學教習乾隆壬戌成進士選庶吉士年已五十矣以母老告歸逾年卒應熙家故貧且好遊所至多不可而睥睨物態感傷激鬱若無可如何者而一發於詩文當時惟武甯盛于野兄弟相知最深應熙沒後爲序其所著鐵甕馬肝等集以傳書法遒勁至今人皆寶之馮道揆字聖一宣化里人嗜古力學爲文不趨俗好髻年受知於督學潘公宗洛稱爲吳明卿後一人一時名噪江漢間雍正癸卯中鄉試年四十賚志以沒

興國州志

卷二十 文學

三十九

周旋字履元尊賢坊人雍正元年拔貢生所學尤邃於易著有斲窗新編四十卷杜詩夢六卷沙鷗集四卷皆卓然可傳性孤峭下能諧俗八年大府聘修湖廣通志不就與修州志甫三月與同事不合擲筆告退作感懷詩十首中有中郎稱妙手估客亦相知之句蓋有爲言之也

袁良恪字備三博學多能以名諸生充歲貢弱冠隨兄良怡任遇疑事輒迎刃而解前後三十餘年多所裨益雍正庚戌與修州志

張裔昇字二霞翰扶子乾隆辛酉科副榜就職直隸州州判掌教

富川書院三十餘年生徒以千計裔昇性敏勤學蒐羅經史及諸子百家爲文博麗著有二霞文集學者稱爲富川先生

石鏜光字金堂崇仁里人幼有至性事嗣母能色養母歿以田贍舅氏三鬻而三贖之友愛兄弟讓產至數千金學問深邃乾隆王申 恩科與弟鈞光同領鄉薦大挑二等選天門縣教諭有諸生被誣麗危法或勸鏜光揭生以自解鏜光毅然持之事以卒白秩滿移疾歸年八十一卒孫時和已中鄉試矣

鄧光仁字體園慈口里人乾隆癸酉拔貢考補鑲藍旗官學教習報滿選穀城縣教諭丁憂服闋選竹山縣教諭病竹山志散佚

興國州志

卷二十 文學

四十

蒐羅舊聞編輯成書推陞湖南永州府教授致仕歸里光仁生平好學讀經史及大家文皆有評解著有時文踵虛約編行世最後有湘行草長安紀話待梓

萬年書字東曙尊賢坊人乾隆乙酉科舉鄉試第二名主正定府平山天貴二書院以方正見重時有執政慕其名欲致之者介然不往後授潛江縣教諭嘉慶辛酉會試 賜檢討歸里主富川書院著有制藝待梓

胡興遐字錫齡辛亭里人儻有大志工古文詞弱冠食餼每試輒冠其曹乾隆乙酉考取拔貢生 廷試後授職直隸州州判



未就南歸主講富川書院從遊多知名士所著有箋書釋詩註  
騷數卷海紅樓詩稿十卷

方晉源字昭德長慶里人安貧力學舉乾隆戊申鄉試有友令陝  
西山陽聘主豐陽書院值教匪告警令從征託以家事晉源爲  
經紀旦夕入慰其老母如是者三年生平廉潔自矢嘗將北上  
道出富池適兌運州牧贈以金辭曰餽贐晉源面郤之曰吾豈  
效鄙夫藉口漕糧浮收同吏胥分肥耶州守慙謝嘉慶丁丑大  
挑二等選授長陽縣教諭兼主佷山書院訓迪不倦卒于學署  
喪歸之日生徒百餘人附舟號泣已而建祠與邑令劉公並祀

興國州志

卷二十 文學

四十一

云

鍾茂詮字徽典修善里人伯父榮國官房縣訓導茂詮隨往受業  
者甚多嘉慶初白蓮教煽亂圍房七日茂詮與伯父各以一繩  
繫腰曰城破則畢命於繩耳及圍解上官查辦習教案牽連應  
誅者甚夥茂詮習知其良莠密白於官多所全活嘉慶戊午嶺  
鄉薦年已五十人以爲陰德之報戊辰大挑二等選授長陽縣  
教諭長陽僻陋文無師法茂詮循循善誘如在房時連歲遂有  
登賢書者司鐸七年告歸越十年卒著有翰圃制藝接引心等  
稿

陳希邁字雙泉仁義里人嘉慶辛酉歲貢篤學勵操博聞強識爲文取法歐蘇詩宗少陵其渾樸處似之著有躋雲軒詩文集  
余雨字東之豐義里人父自燿增生以篤行爲閭里望雨率父教勵品勤學爲文章一準先正舉嘉慶甲子科鄉試大挑二等選保康縣訓導告歸主講富川書院雨性冲淡得失不介於懷吟咏之餘別無所好著有大雅山人詩集三十卷梓行者十之一外有讀書儷記四卷弟柏邠字錦嵐少師事雨亦以文稱舉嘉慶己卯科鄉試著有左傳譜略樂律圖考及都門草銅門草等書

石長甲原名文斗樂歲里人垂髫入泮有神童之目長好天官書嘗言秦得歲楚將有亂遂適秦比至則白蓮教匪起於秦滋蔓於楚流離瑣尾遂不得歸鎮安縣令馬公見其文異之招入署時兵火後士籍多淆爲援例入太學嘉慶甲子入試秦闈登賢書明年成進士以知縣分發浙江忽得病卒于都時宗人時榘官刑部爲經紀其喪其所撰述僅存玉笋山房詩文稿一卷  
羅德琨字玉岡宣化里人嘉慶丁卯科舉人大挑二等選施南府訓導在任十六年修府志三十卷德琨淹貫經史勤於著述有景行錄十五卷服物統譜三十卷姓氏尋源八卷字學十辨十

卷安雅堂詩集十卷道光間輯州志稿舊志闕誤者亦多考正  
洪秉鈞字鸞岡陽新里人好古多聞工詩賦試輒高等以次充嘉  
慶丁卯歲貢掌教富川書院十有七年一時名士多出其門爲  
文敏捷每脫稿爲人持去亦不自珍惜也

司光國字漢典宣化里人困諸生者二十年嘉慶丙子科中鄉試  
第七時直省文風浮濫光國平日獨宗先正闡墨出人始知宗  
先正者亦中雋也時習爲之一變家素裕兄宜和以好施貧其  
家無幾微怨兄偶以事怒之受杖惟謹好夜讀書又好飲酒卒  
以此傷其生未及北上士林惜之著有犀岩窗稿四卷藏於家

興國州志

卷二十 文學

四十三

趙貢揚字禮石鰲孫家貧力學早食餼充嘉慶戊寅 恩貢中道  
光乙酉副榜性端方主講富川書院州牧重之有以私干者厚  
贖請謁力卻之著有擷經堂稿

馮峻字登洲宣化里人聰敏好學爲文能獨出機杼而尤肆力於  
古學使朱公蘭深賞之道光丁酉科考取拔貢生明年 廷試  
報罷就直隸州州判職以歸或謂君年方壯且爭名者於朝盍  
畱諸峻曰顯揚未可知而重幃遠隔余不能愬然也咸豐間粵  
匪陷州屢脅以僞職終不屈克復後襄辦捐輸不激不隨興修  
州志未及成而卒著有融峯試草滋德堂雜著

陳沆字霏之仁義里人治策次子學有家法因隨任雲和納監生應鄉試每學使錄科輒第一而數奇九膺薦不售嘗嘆曰監生多原伯魯後世誰知我爲讀書人乎著有自然居古文駢文各二卷其子元櫛將以付梓無何粵匪竄擾遂失之人以爲沆身後之厄云

成斌邁字道立樂平里人幼負異稟經史輒過目成誦爲文援筆立就學使潘公宗洛按臨武昌三屬合試斌邁六題並構學使驚爲奇才招入署與宜興儲氏伯仲共司襄校後舉康熙庚子鄉試選授荊州府學訓導著有陽城山房文集儲中子先生序

興國州志

卷二十 文學

四十四

而評之然其行事倣詭不羈或謂爲智者之過云

萬選字惟一尊賢坊人性剛毅廉退嗜學能文試輒冠軍乾隆壬辰邊學使考授歲貢庚戌選保康縣訓導在任十年課諸生以經術爲先後告歸年登九十

鄧射斗字班黃慈口里人性敏工文一日能構十三藝年十七入庠旋食廩餼授讀三十餘年生徒多所造就道光辛巳壬午連捷南宮知湖南宜漳沅江等縣事爲治不煩而理卒於任著有四書衍義困棘集課蒙草湘遊草

文學 增補

明

劉之斗字世卿興教里人師穎子萬厯庚辰選拔貢生涉獵經史尤精於易工書法瓣香二王著有星樞詩文集

國朝

劉慶海字甫觀興教里人舉乾隆丙子科鄉試揀選知縣歷任鄖縣鍾祥公安等縣教諭訓課士子以飭品敦倫爲先遷湖南永州府教授著有厲廉集八旬致仕優游林下誘掖後進多所成就

興國州志

卷二十 文學

四十五

劉冰字鉏雪以貢生候選布理問學綜箋注務究本源著有詩經說約四卷書臨鍾王人得片楮輒珍弄之性慷慨遇荒歲輒賑貸無少吝

劉宇儀字嘯墅興教里人庠生慶海從姪孫究心古文工吟詠爲人敦樸誼篤友于家僅中人弟產落分郭外田與之俾終天年族邨義之著有南遊日記唐宋八家文軌辨體書照齋詩文稿劉十賢字定藩歲貢生尊賢坊人夏太史觀川主講江漢呼爲小友聲名藉甚平居深默無妄談接人藹然可親著有校書堂詩

文集

郭書字湘帆拔貢生中嘉慶己卯舉人大挑二等選宣恩縣教諭  
訓迪有方士風丕變工詩文書臨趙董家居以孝友聞并倡立  
賓興士林德之著有文賦及古近體詩各集

劉炳字午橋興教里人道光壬辰舉人揀選注部甲辰大挑二等  
授黃岡教諭以品端學裕教士有方膺上考咸豐間與黃岡令  
蕭致遠共督團防捐廉助餉旋遷漢陽教授歷校河東晴川問  
津紫峯各書院課藝釐正文體士風丕振歸田後足不涉公庭  
接人和煦鄉里化之卒年七十八著有棣花軒試帖合編求慊  
堂雜著

興國州志

卷二十 文學

四十六

張如鎗號聲甫宣化坊人優廩生道光辛丑崇陽滋事防堵出力  
議敘正九品銜性聰穎讀書一目十行以經古冠軍入泮丁酉  
備取選拔著有希齋詩集

劉會霖字西疇興教里人弱冠以府試冠軍入郡庠歲科必高等  
七膺房薦備中三卒以數奇見遺以 恩貢生候選教諭光緒  
丁丑門人劉鳳綸宰鉛山延會霖講學鵞湖一闡朱陸奧旨著  
有乙照齋制藝

柯南先字大庾豐葉里人舉道光壬辰副車隱居授徒歲論秀門  
弟子十居四五或相繼擢高科登顯仕去束脩所入悉以屬弟

弟故揮霍好施予家曰嗇弗問也纂有古文貫五經翼訓四書滄  
註學庸繹傳於時

馮瑞錦字功甫永城里人弱冠冠於庠晚貢成均研究性理言動  
有日錄著雲房問答數千言羽翼聖教

易簡字芳谷宣化坊人性孝友道光乙未舉於鄉甲辰大挑二等  
選建始訓導丁母憂未赴任服闋隨州學正亦未之官主講富  
川書院尙實學州城義舉多所提倡著有周易集解待梓

孔廣緝字京周歲貢生下陽辛里人博涉經史百家書作文不趨  
時徑晚又得朱子學歸讀之喟然謂其門人萬斛泉曰吾乃今

興國州志

卷二十 文學

四十七

知儒者之道真在此不在彼而前日詞章之習貽誤匪淺也朝  
夕坐一齋教二子務於篤實後相繼列膠庠著有論語管窺禹  
貢錐指摘要經對舉隅及漱六山墅文稿諸集

柯序先字鶴岡庠生東鄉里人性坦率人雖面謾不以爲疑然窮  
年兀兀癖嗜簡編有書癡之目手著廣姓纍珠三十卷尋源錄  
十卷諗癡集十卷

黃子芳字芹香善福里人弱冠補弟子員科試輒高等食餼著有  
四書撮鈔待梓惜嬰病累年三十二而卒

劉漢杰字臞梅懷仁里人舉咸豐壬子鄉試學宗先正尤精古文

授荆門直隸州學正加內閣中書銜勗士以立行爲先風爲之  
變性純孝母年過百齡凡有行止無不稟承母命奉諱後歸主  
講富川書院啟誘後進人咸思之著有臞梅詩文集



文學 又增

盧秀字子實歲貢生才敏學博試輒冠其曹康熙四年與修州志

舊志

劉守禮經術堪深爲文卓犖有奇氣髫齡補諸生試輒上等著有

易經講義古詩選注諸書學者稱三泉先生

舊志

劉世系崇慶里諸生能文工詩康熙四年與修州志

舊志

石魁字公黃諸生學問淵博文名藉甚著有西潭文集二十四卷

枕笈祕書三卷天經實義二十四卷及古今忠孝傳孤遊草等

書

舊志

興國州志

卷二十 文學

四十九

劉漢章字虛侯崇仁里諸生三友子博通經史著有陶間集行世

李之恢字癯石宣化里舉人志趣高邁抗心希古爲文自出機杼

清超拔俗主講富川書院與江西武甯高士張望以文字相過

從稱知己恢卒望爲文誄之著有平泉山房詩文集

石應期字海琴玖光子未冠補諸生嘉慶戊寅舉於鄉十上春官

不第以大挑補竹山訓導致仕歸主講富川書院生徒爭自濯

磨氣節科名一時稱盛應期性峭直愛才如命教人以敦品勵

行爲先著有屏山堂詩古文子子時榕亦著有鄂遊草續草諸

詩集行世

阮賓賢字卓夫吉口里諸生少負異才文譽藉甚游陳制軍中孚幕公件多出其手性剛介好義舉倡建賓興士林利賴著有小霞齋詩文雜著行世

羅有文字龍洲道光甲午經魁大挑選松滋訓導主講谷山書院從遊者四縣雲集以才學兼優堪膺民社注上考奉委辦團又勘松滋水災並督修堤工敘六品銜國子監學正調署公安終漢陽教授著有松窗史錄周易觀象續雨堂詩集

陳圭元字靜巖道光己亥舉人性沈默研心理學言動不苟有白沙遺風授徒講藝首重器識薰其德者化爲善良子震孫鳳恩

興國州志

卷二十 文學

五十

三世登科人謂純修之後必大云

方瀛字仲舫炳文子咸豐辛亥舉人以功保內閣中書晉同知升用府會試四膺房薦光緒七年鮑爵帥超聘入幕由川而黔而滇進駐廣南相機勦法十一年和議成軍撤投効天津此塘江提督自康營以積勞病故經李爵相請卹功在奏牘瀛生於湖南官舍七齡能詩見賞陶文毅公湘軍初起瀛卽從戎出入胡文忠曾文正幕府委辦軍務時幕中賓僚之盛比古名帥瀛日與討論軍事詩酒唱酬不數年交游多得達官終未嘗往干焉爲人方雅和易有膽識嘗奉符轉運江楚間舟過賊壘僕從怖伏

艙內中礮斃瀛坐矢石間卒不爲動陸行遇賊脅奪肩輿有□  
銀在橐勢危甚瀛神色不變竟以他辭給賊免初寓婦翁家有  
僞職媚其酋以五百金勾撰壽言者怒辭以拒翌日僞黨大索  
不得執婦兄勒賄而去人壯之瀛嗜學強記諸子百家靡不淹  
貫又諳練時務於用兵要隘山川形勢瞭如指掌有所感激一  
寄之於詩時比之李玉溪杜樊川云著有聽雨樓賸稿選載藝  
文

華蔚巖字椒堂下遷里諸生研心數學博綜羣書揮塵清談有晉  
人風著有列國總論追述草椒堂集行世僑居江西武甯從游

興國州志

卷二十 文學

五十一

多知名士武甯縣志列寓賢

陳元櫛字醒齋仁義里歲貢治策孫沆子博學工文迭膺薦咸  
豐間督辦團防捐輸叙六品銜櫛爲人魁岸倜儻曉暢軍機遭  
逢不偶未竟其用士林惜之著有韞石窗詩集十卷行世

石建點字心波鏜光曾孫幼穎耽書淹貫經史工詩古文辭未冠  
餼於庠登咸豐戊午賢書大挑二等授鶴峯州訓導歷任五載  
月課講藝勛以敦行鶴峯古美容土司地俗健訟點懲其尤刁  
風頓戢有周生應得廩缺吳生恃富援案牽誣希圖攙越點直  
之竟補周及歸鶴人贈以心蹟雙清額點爲人端嚴耿介取與

不苟非其人，不交老猶好。學手不釋卷，生平作養後。進桃李盈門，著有《紉蘭齋詩文集》。

黃蘭澤字香帆，東鄉里諸生。性穎，十齡屬文。工敏如宿士，餼于庠。試輒冠軍，爲青衿領袖。門下掇巍科，膺顯秩者濟濟。竟以數奇，不售。甫逾強仕而卒，著有試帖、選腴八卷、箋釋精詳、批竅導要。士林珍爲枕秘。

熊榮字堯臣，樂歲里諸生。幼穎經史，過目成誦，爲文豪宕不羈。如其人屢躋闈場，不獲展其抱負，遂放懷山水間，以詩酒自娛。人比之陶元亮。云著有詠史詩集、子奎斗廩生。

興國州志

卷二十 文學

五十二

陳階樹字子巖，永章里郡庠生。敦倫飭品，以實學誘掖後進。多所玉成，著有學庸輯義、聚奎堂文稿。子若龍、若麟，俱庠生。

石增烈字介性，博學能文。磊落不羈，著有《丐鋤騶詩稿》。陝西路閩生德爲之序。

張榜字占名，寶政里廩膳生。性端慤，耽研經史數十年。誨誘後進，望重師儒。著有道學源流韻語一卷、續補史學蒙求二卷。

陳時臬字玉光，仁義里增生。績學能文，弱冠與弟登甲，同遊庠生。平肆力詩古文辭，爲人和易，宿望歸然。著有《柳溪集》四卷、《孫鴻猷諸生》。

武功

明

朱希光崇禎十六年獻賊入境同鄧嘉會拒戰白沙舖追至大冶

縣擒偽官奚鼎鉉人皆壯之舊志列義士今改入

鄧嘉會字君顯典吏也獻賊犯境同朱希光拒戰白沙舖殲其渠

巡撫何公錄其功補黃安主簿攝縣事招撫流亡重建縣署

國朝

梁勇字常卿樂歲里人由興國營百總勦西山賊獲渠魁補荊州

把總隨 順承郡王渡江攻長沙安仁彬州峒口等處克復耒

興國州志 卷二十 武功

五十三

陽常甯永州新甯等城屢負重傷擢千總調赴常德攻辰龍關

至貴州恢復石阡進攻平遠追抵芙蓉關高家礮而獻馘焉復

奪瀘溪麻陽賊糧攻重關及走馬街所在有功功加四等都司

簽書後滇逆未靖調至霑益州堵勦單騎招撫偽郭總兵龔遊

擊等繳偽劄六十四張由是克復滇城 召見加都督僉事補

陝西撫標遊擊食正二品俸歸林二十餘年卒按西山賊蓋流賊餘黨李來亨

等竄伏鄖襄山中康熙三年官軍討平之

王國用字君寵康熙間任廣西桂林協副將軍功紀錄七次世襲

章京拖沙喇哈番食正一品俸子蔭 恩監生按舊志於國代

俱未及載今訪得州南十五里東陽阪地方石姓山內有國  
用墓墓碑亦僅書官階惟旁書國用生於癸未沒於康熙五  
十五年茲  
據錄之

蔡卜年字松齋長慶里人初肄舉子業中雍正乙卯武舉乾隆丁  
巳進士授藍翎侍衛選貴州天柱營都司累遷至山西潞澤營  
參將考選軍政 恩賜蟒袍陞貴州上江協副將調署古州鎮  
總兵護理貴州提督印務保列一等實授廣西左江鎮總兵因  
副將任內事降補福建甯營游擊時值臺灣凶番猖獗奉委  
在北路蛤仔市口進兵獲凶番首級三十五顆直抵庸仔三社  
凶番巢穴燬其寮糧其安分生番皆招撫投順調台灣鎮中軍

興國州志

卷二十 武功

五十四

遊擊兼署北路協副將致仕歸里卒年八十三卜年官侍衛□  
移修京都興國館於頭條衚衕州人士德之設神主以祀焉  
程萬年字自邠宣教里人乾隆丙子武舉辛巳 恩科進士由侍  
衛分發廣西補柳州城守營都司調三里營都司署賓州營叅  
將壬申年推陞四川叙馬營遊擊奉檄統領官兵出征金川彈  
壓南路丹東吉等處關隘乙未隨阿將軍擒索諾木凱旋復奉  
檄統領漢土官兵彈壓西藏察木多台站兼理都昌糧務  
魯福山永福里人武力絕人以軍功出身嘉慶二十五年從征陝  
西教匪立功受千總職道光十八年陞莊浪協副將署西安鎮

總兵

秦定三字竹坡道光壬午武舉丙戌會試中式己丑 殿試一甲  
第二授二等侍衛以年勞選廣西桂林營遊擊陞中衡協參將  
二十一年暎夷擾粵定三以防勦出力 賞戴花翎擢四川維  
州協副將貴州鎮遠鎮總兵二十九年湖南逆匪李沅發謀逆  
奉 旨帶兵撲滅 賞愨勇巴圖魯勇號咸豐元年給長孫承  
恩二品蔭生旋因粵匪倡亂奉 命赴粵西會勦是時賊甚猖  
獗定三身先士卒一日七勝由廣西兩湖九江安慶而至江南  
四年奉 命赴廬州督辦北路軍務進紮舒城之三角井逆首

興國州志

卷二十 武功

五十五

羅大剛踞桐舒兩城以賊衆十餘萬圍撲我軍各營多潰定三  
以本部親兵千餘及曹營團丁千餘相持十九晝夜次子瑞龍  
陣亡卒奮力學退克復舒城 賞騎都尉世職尋擢福建陸路  
提督時桐舒連年旱蝗定三焚香祝天雨沛蝗亦飛去七年夏  
由臨淮赴江南會攻溧水句容旋克復因行營日久受潮溼遂  
病卒於溧水軍營 諭賜祭葬 予諡恭武長子臺貴州縣丞  
加 恩以知縣畱貴州補用並 賞一子六品銜

趙旣發字豐山豐義里人咸豐五年粵匪再陷鄂都統多隆阿公  
來督軍務旣發往謁軍門與語奇之使充勇丁遇敵輒爭先由

把總擢千總七年從攻黃蠟山身先士卒毀賊壘四十八座復宿松縣又獲楓香驛駝龍山分茅嶺界嶺石碑諸勝仗遂擢都司九年以楚軍回援宿太三次血戰擢遊擊 賞換花翎隨克石碑僞城奪獲僞印無數 賞毅勇巴圖魯勇號十年春擊退小池驛援賊復潛山縣城粵匪乃勾連捻逆十餘萬來犯均擊破之十一年春賊由湖北下竄援安慶襲楚軍既發鏖戰十餘日賊始潰累擢至副將加總兵銜調攻桐城克之復率所部星夜追勦收復宿松太湖黃梅廣濟是役也績甚鉅奉 旨記名以總兵遇缺簡放同治元年夏調攻廬州有功加提督銜秋從

多公援陝以荆紫關之捷受傷假歸湖北閣督官文恭公巡撫嚴公爭禮之爲招毅健四營使統焉旋因渭南未下復調至陝時多公及各營將官俱被圍既發至破賊壘四十餘座圍遂解授漢中鎮總兵明年攻潼關統領各營事務官軍駐渭河倉頭鎮已潰之賊渡河來撲既發直前奮擊身受重傷衝圍出堅守營壘賊不得逞越二日遂殞時同治二年六月十四日也 上聞深悼之照提督陣亡例從優議卹 敕建專祠於殉難地方 給賞卹銀八百兩 贈提督銜 給騎都尉兼一雲騎尉世職同治三年 予諡武毅